

San Nicolas lo hunga un rol mas predominante

Aruba lo tin su II Encuentro Bienal di Arte Contemporaneo di Caribe na 2016

ORANJESTAD - Ta un hecho cu pa 2016 lo wordo organisa e di dos Encuentro Bienal di Arte Contemporaneo di Caribe na Aruba.

Secretario di fundacion Encuentro Bienal Aruba, sr. Roly Sint Jago a declara na Bon Dia Aruba cu nan ta trahando caba riba e organizacion di e bienal aki y nan a cuminsa bati e portanan di instancianan y organisacionnan pa nan por haya e fondonan necesario.

Contacto Bienal Habana
Igualmente sr. Sint Jago a bishita hunto cu e directora di Fundacion Encuentro Bienal Aruba, e artista Alida Martinez pa bishita e Bienal di Habana cu ta tumando lugha actualmente. Nan a bay pa fortalece e lasonan cu e Bienal di Cuba, ya cu esaki ta un bienal cu ta aparece riba e cinco bienal mas reconoci y grandi di mundo.

"E no ta cualkier bienal. Y den nos esfera e ta e bienal di mas importante", el a bisa. Tambe e ta e bienal mas cerca den nos region. El a bisa cu e bienal na Cuba tin lasonan personal cu Aruba. Den sentido cu den pasado varios artista Arubiano of residencia na Aruba a wordo invita pa participa den e bienal aki na Habana. E di 12 Bienal di Habana bou e titulo "Entre la Idea y la Experiencia" ta tumando lugha actualmente, y e ta conta cu presencia di e artista Nelson Gonzalez residencia na Aruba.

Fei 22 di mei te cu 22 di juni e artista Gonzalez ta exhibi un "performance" den e bario conoci como Casa Blanca. Prome cu ne tabatin artistanan local entre otro Alida Martinez, Ryan Oduber y Elvis Lopez cu a muestra nan talentonan pa medio di nan

obra riba un escenario asina importante pa arte contemporaneo como e Bienal di Arte na Habana.

"Pues pa Aruba e bienal di Habana no ta un bienal desconoci", el a bisa.

Curator y organizacion

E curator y experto riba arte contemporaneo, sr. Jose Manuel Noceda den pasado a facilita su experticio pa bira e curator di e Prome Encuentro Bienal di Caribe di Arte Contemporaneo celebra riba nos isla. Sr. Sint Jago a declara na Bon Dia Aruba cu nan idea ta pa sr. Noceda lo bira e curator di e di dos version di nos encuentro bienal. Pa e motibo ey e fundacion cu a organisa e prome encuentro bienal representa pa e artista Martinez y sr. Sint Jago a bay Habana. Nan a bay delibera cu sr. Noceda riba nan idea di bin cu e di II Encuentro Bienal na Aruba cu ta plania pa tuma lugha na aña 2016.

Aunke e programa no ta full cla ainda, ya caba nan tin un idea riba e tema principal. Sr. Sint Jago tabata masha reserva pa papia riba e tema principal di e proximo bienal na Aruba, ya cu nan tin cu papia cu algun instancianan local ainda y notifica nan prome, antes cu nan ta bay publico cun'e. Un di e plannan sigur ta cu nan lo tin cu honra artistanan of talentonan historico di Aruba den e encuentro aki di arte contemporaneo di Caribe.

"Nos kier saca Aruba dilanti tumando na cuenta cu e ta sede di e II Encuentro Bienal di Arte Contemporaneo di Caribe", el a bisa.

Tambe nan tin un bista riba e grupo di artista cu lo wordo invita dor di e curator. Nan lo ta artistanan hoben di nos region y tambe di Aruba pa stimula e talento nobo participa den un evento di e calibra aki, asina sr. Sint Jago a laga



sa.

Actualmente nan ta ocupa cu instancianan cu lo por financia e proyecto cultural aki cu ta promove Aruba y su artistanan plastico. Pero ainda no a wordo traha un plan filio, tampoco un presupuesto filio. E ta spera cu den e lunanan cu ta bini, y specialmente na final di juni, despues cu e bienal di Habana termina, directiva di e fundacion lo traha mas duru pa keda cla cu e planificacion y stipulacion riba con e di II Encuentro Bienal di Aruba lo ta.

San Nicolas

E prome Encuentro Bienal di Arte Contemporaneo di Caribe na Aruba cu a tuma lugha na aña 2012 a enfoca mas tanto riba exhibicion di arte den sitio publico, y esun di otro aña eventualmente lo tin otro característica.

Sr. Sint Jago a indica cu esaki tin di haber cu e prome bienal a sosode ora cu minister Michelle Hooyboer-Winklaar tabata minister di Cultura e tempo aya. Actualmente otro minister sr. Otmar Oduber ta ocupa cu e cartera di cultura aki, y seguramente sr. Oduber lo tin su idea tambe riba e forma di realisa e bienal aki. Secretario di e fundacion Encuentro Bienal di Arte Contemporaneo Aruba a bisa cu un di e puntonan cu ta destaca mas den e maneho di minister Oduber pa loka ta cultura ta, cu e ta minister di Turismo tambe y e ta accentuando masha hopi mes den San Nicolas como segundo ciudad di turismo y di arte. Como tal sr. Sint Jago ta kere cu e idea ta pa nan wak di ki forma San Nicolas lo hunga un rol mas predominante di loka e tabata hunga den e prome encuentro bienal. □